

26/08/1997

Pertahan politik muafakat

KUCHING, Isnin - Pemimpin pelapis dalam Barisan Nasional (BN) perlu mempertahankan sistem politik, kerjasama dan muafakat yang dicapai oleh kepemimpinan BN sejak dulu hinggalah kini, kata Datuk Seri Anwar Ibrahim.

Mereka perlu mewarisi cara kepemimpinan Perdana Menteri, Datuk Seri Dr Mahathir Mohamad, yang sentiasa mengutamakan kestabilan, keamanan dan keselamatan dalam pertimbangan memantapkan lagi pertumbuhan ekonomi.

Pemuda BN, kata Timbalan Perdana Menteri, perlu mewarisi corak kepemimpinan sekarang dan sebelumnya dengan menerapkan semangat dan komitmen yang sama dalam diri mereka.

"Malah salah satu rumusan dalam sidang Dewan Tertinggi BN yang dipengerusikan Dr Mahathir baru-baru ini ialah menggesa Pemuda BN agar terus memberi sokongan dan dorongan dengan mengadakan pertemuan dan kegiatan bagi menjamin persefahaman lebih bererti dan mendalam," katanya.

Beliau yang juga Timbalan Pengerusi BN menegaskan demikian dalam ucapan perdana pada Konvensyen Pemuda BN di Damai Lagoon, kira-kira 40 kilometer dari sini. Hadir sama ialah Ketua Menteri, Tan Sri Abdul Taib Mahmud; Ketua Pergerakan Pemuda BN, Datuk Ahmad Zahid Hamidi dan Ketua Pergerakan Pemuda BN Sarawak, Datuk Celestine Ujang anak Jilan.

Anwar yang gembira kerana Zahid meneruskan tradisi dialog dan perbincangan ke arah mengukuhkan permuafakatan dalam BN berkata, kerjasama dan muafakat penting ke arah menjamin kesinambungan pencapaian BN hari ini.

Beliau turut menekankan pentingnya sikap memahami dan menghormati, selain bertolak ansur dalam menangani apa jua perbezaan yang wujud antara kaum yang ada di negara ini.

"Dalam al-Quran sendiri ditekankan perlunya sikap menghormati dan menghargai perbezaan warna kulit, kaum, kabilah, kerana semuanya ditentukan Allah.

"Jika Allah menentukan kita sudah berbeza, kita tidak berhak mengecam, menindas, menentang dan mengasing perbezaan yang ada. Ini adalah prinsip yang cukup penting," katanya.

Sambil merujuk kepada Sarawak yang mempunyai suku kaum paling ramai dan disifatkannya sebagai `negeri paling sukar' Anwar berkata, politik pembangunan di bawah kepemimpinan Taib dapat dilaksanakan dengan berkesan kerana ada kestabilan, keamanan dan kesederhanaan.

(END)